

四庫全書

子部

欽定四庫全書

子部
經濟類編卷八十五

詳校官中書臣瞿 煦

主事臣 祁韻士覆勘

總校官知縣 臣 繆 琪

校對官編修 臣 錢 樾

謄錄監生 臣 沈錫爵

欽定四庫全書

經濟類編卷八十五

人品類二

忠節

十四則

馮琦馮瑗 撰

呂覽至忠篇 至忠逆於耳倒於心非賢主其孰能聽
之故賢主之所說不肖主之所誅也人主無不惡暴劫
者而日致之惡之何益今有樹於此而欲其美也人時

灌之則惡之而日伐其根則必無活樹矣夫惡聞忠言
乃自伐之精者也荆莊哀王獵於雲夢射隨兕中之申
公子培劫王而奪之王曰何其暴而不敬也命吏誅之
左右大夫皆進諫曰子培賢者也又為王百倍之臣此
必有故願察之也不出三月子培疾而死荆興師戰於
兩棠大勝晉歸而賞有功者申公子培之弟進請賞於
軍旅曰臣兄之有功也於車下王曰何謂也對曰臣之
兄犯暴不敬之名觸死亡之罪於王之側其愚心將以

忠於君王之身而持千歲之壽也臣之兄嘗讀故記曰
殺隨兇者不出三月是以臣之兄驚懼而爭之故伏其
罪而死王令人發平府而視之於故記果有乃厚賞之
申公子培其忠也可謂穆行矣穆行之意人知之不為
勸人不知不為沮行無高乎此矣齊王疾瘠使人之宋
迎文摯文摯至視王之疾謂太子曰王之疾必可已也
雖然王之疾已則必殺摯也太子曰何故文摯對曰非
怒王則疾不可治怒王則摯必死太子頓首彊請曰苟

已王之疾臣與臣之母以死爭之於王王必幸臣與臣之母願先生之勿患也文摯曰諾請以死為王與太子期而將往不當者三齊王固已怒矣文摯至不解屨登牀履王衣問王之疾王怒而不與言文摯因出辭以重怒王王叱而起疾乃遂已王大怒不說將生烹文摯太子與王后急爭之而不能得果以鼎生烹文摯爨之日三夜顏色不變文摯曰誠欲殺我則胡不覆之以絕陰陽之氣王使覆之文摯乃死夫忠於治世易忠於濁

世難文摯非不知活王之疾而身獲死也為太子行難以成其義也

劉向立節篇 士君子之有勇而果於行者不以立節行義而以妄死非名豈不痛哉士有殺身以成仁觸害以立義倚於節理而不議死地故能身死名流於來世非有勇斷孰能行之子路曰不能勤苦不能恬貧窮不能輕死亡而曰我能行義吾不信也昔者申包胥立于秦庭七日七夜哭不絕聲遂以存楚不能勤苦安能行

此曾子布衣緼袍未得完糟糠之食藜藿之羹未得飽
義不合則辭上卿不怙貧窮安能行此比干將死而諫
逾忠伯夷叔齊餓死于首陽而志逾彰不輕死亡安能
行此故夫士欲立義行道毋論難易而後能行之立身
著名無顧利害而後能成之詩曰彼其之子碩大且篤
非良篤修激之君子其誰能行之哉王子比干殺身以
成其忠伯夷叔齊殺身以成其廉此三子者皆天下之
通士也豈不愛其身哉以為夫義之不立名之不著是

士之恥也故殺身以遂其行因此觀之卑賤貧窮非士之恥也夫士之所恥者天下舉忠而士不與焉舉信而士不與焉舉廉而士不與焉三者在乎身名傳于後世與日月並而不息雖無道之世不能污焉然則非好死而惡生也非惡富貴而樂貧賤也由其道遵其理尊貴及已士不辭也孔子曰富而可求雖執鞭之士吾亦為之富而不可求從吾所好大聖之操也詩云我心匪石不可轉也我心匪席不可卷也言不失已也能不失已

然後可以濟難矣此士君子之所以越衆也

晉獻公使荀息傅奚齊公疾召之曰以是藐諸孤辱在
大夫其若之何稽首而對曰臣竭其股肱之力加之以
忠貞其濟君之靈也不濟則以死繼之公曰何謂忠貞
對曰公家之利知無不為忠也送往事居耦俱無猜貞
也及里克將殺奚齊先告荀息曰三怨將作秦晉輔之
子將何如荀息曰將死之里克曰無益也荀叔曰吾與
先君言矣不可以貳能欲復言而愛身乎雖無益也將

焉辟之且人之欲善誰不如我我欲無貳而能謂人已乎里克殺奚齊于次書曰殺其君之子未葬也荀息將死之人曰不如立卓子而輔之荀息立公子卓以葬里克殺公子卓于朝荀息死之君子曰詩所謂白圭之玷尚可磨也斯言之玷不可為也荀息有焉

惠公卒懷公命無從亡人期期而不至無赦狐突之子毛及偃從重耳在秦弗召冬懷公執狐突曰子來則免對曰子之能仕父教之忠古之制也策名委質貳乃辟

也今臣之子名在重耳有年數矣若又召之教之貳也父教子貳何以事君刑之不濫君之明也臣之願也淫刑以逞誰則無罪臣聞命矣乃殺之卜偃稱疾不出曰周書有之乃大明服已則不明而殺人以逞不亦難乎民不見德而唯戮是聞其何後之有

文公誅觀伏以伐鄭及其埤鄭人以名寶行成公弗許曰予我詹而師還詹請往鄭伯弗許詹固請曰一臣可以赦百姓而定社稷君何愛於臣也鄭人以詹予晉人

晉人將亨之詹曰臣願獲盡辭而死固所願也公聽其辭詹曰天降鄭禍使淫觀伏棄禮違親臣曰不可夫晉公子賢明其左右皆卿才若復其國而得志於諸侯禍無赦矣今禍及矣尊明勝患知也殺身贖國忠也乃就亨據鼎耳而疾號曰自今以往知忠以事君者與詹同乃命弗殺厚為之禮而歸之鄭人以詹伯為將軍

武公伐翼殺哀侯止欒共子曰苟無死吾以子見天子令子為上卿制晉國之政辭曰成聞之民生於三事之

如一父生之師教之君食之非父不生非食不長非教不知生之族也故壹事也唯其所在則致死焉報生以死報賜以力人之道也臣敢以私利廢人之道君何以訓矣且君知成之從也未知其待於曲沃也從君而貳君焉用之遂闕而死

魯叔孫成子逆昭公之喪于乾侯季孫曰子家子亟言於我未嘗不中吾志也吾欲與之從政子必止之且聽命焉子家子不見叔孫易幾而哭叔孫請見子家子子

家子辭曰羈未得見而從君以出君不命而薨羈不敢見叔孫使告之曰公衍公為實使羣臣不得事君若公子宋主社稷則羣臣之願也凡從君出而可以入者將唯子是聽子家氏未有後季孫願與子從政此皆季孫之願也使不敢以告對曰若立君則有卿士大夫與守龜在羈弗敢知若從君者則貌而出者入可也寇而出者行可也若羈也則君知其出也而未知其入也羈將逃也喪及壞墮公子宋先入從公者皆自壞墮反

宋閔公臣長萬以勇力聞萬與魯戰師敗為魯所獲囚之宮中數月歸之宋宋閔公博婦人在側公謂萬曰魯君孰與寡人美萬曰魯君美天下諸侯唯魯君耳宜其為君也閔公矜婦人妬因言曰爾魯之囚虜爾何知萬怒遂搏閔公頰齒落於口絕吭而死仇牧聞君死趨而至遇萬于門攜劍而叱之萬臂擊仇牧而殺之齒著於門闔仇牧可謂不畏彊禦矣趨君之難顧不旋踵

衛懿公有臣曰弘演遠使未還狄人攻衛其民曰君之

所與祿位者鶴也所富者宮人也君使宮人與鶴戰余
馬能戰遂潰而去狄人追及懿公於榮澤殺之盡食其
肉獨舍其肝弘演至報使於肝畢呼天而號盡哀而止
曰臣請為表因自刺其腹內懿公之肝而死齊桓公聞
之曰衛之亡也以無道今有臣若此不可不存於是救

衛楚丘

齊莊公且伐莒為車五乘之賓而杞梁華周獨不與焉
故歸而不食其母曰汝生而無義死而無名則雖非五

乘孰不汝笑也汝生而有義死而有名則五乘之賔盡
汝下也趣食乃行杞梁華周同車侍于莊公而行至莒
莒人逆之杞梁華周下鬪獲甲首三百莊公止之曰子
止與子同齊國杞梁華周曰君為五乘之賔而周梁不
與焉是少吾勇也臨敵涉難止我以利是污吾行也深
入多殺者臣之事也齊國之利非吾所知也遂進鬪壞
軍陷陣三軍弗敢當至莒城下莒人以炭置地二人立
有間不能入隰侯重為右曰吾聞古之士犯患涉難者

其去遂于物也來吾踰子隰侯重仗楯伏炭二子乘而入顧而哭之華周後息杞梁曰汝無勇乎何哭之久也華周曰吾豈無勇哉是其勇與我同也而先吾死是以哀之莒人曰子毋死與子同莒國杞梁華周曰去國歸敵非忠臣也去長受賜非正行也且雞鳴而期日中而忘之非信也深入多殺者臣之事也莒國之利非吾所知也遂進闕殺二十七人而死其妻聞之而哭城為之阢而隅為之崩此非所以起也

崔杼弑莊公邢蒯賾使晉而反其僕曰崔杼弑莊公子將奚如邢蒯賾曰驅之將入死而報君其僕曰君之無道也四鄰諸侯莫不聞也以夫子而死之不亦難乎邢蒯賾曰善能言也然亦晚矣子早言我能諫之諫不聽我能去今既不諫又不去吾聞食其祿者死其事吾既食亂君之祿矣又安得治君而死之遂驅車入死其僕曰人有亂君人猶死之我有治長可無死乎乃結轡自刎于車上君子聞之曰邢蒯賾可謂守節死義矣死

者人之所難也僕夫之死也雖未能合義然亦有志士之意矣詩云夙夜匪懈以事一人邢生之謂也孟子曰勇士不忘喪其元僕夫之謂也

崔杼弑其君光晏子立於崔氏之門外其人曰死乎曰獨吾君也乎哉吾死也曰行乎曰吾罪也乎哉吾亡也曰歸乎曰君死安歸君民者豈以陵民社稷是主臣君者豈為其口實社稷是養故君為社稷死則死之為社稷亡則亡之若為已死而為已亡非其私暱誰敢任之

且人有君而弑之吾馬得死之而馬得亡之將庸何歸
門啓而入枕尸股而哭興三踊而出人謂崔子必殺之
崔子曰民之望也舍之得民

費無極言於楚子曰建與伍奢將以方城之外叛自以
為猶宋鄭也齊晉又交輔之將以害楚其事集矣王信
之問伍奢伍奢對曰君一過多矣何信於讒王執伍奢
使城父司馬奮揚殺大子未至而使遣之大子建奔宋
王召奮揚奮揚使城父人執已以至王曰言出於余口

入於爾耳誰告建也對曰臣告之君王命臣曰事建如
事余臣不佞不能苟貳奉初以還不忍後命故遣之既
而悔之亦無及已王曰而敢來何也對曰使而失命召
而不來是再奸也逃無所入王曰歸從政如他日

伍子胥將亡吳辭其友申包胥曰後三年楚不亡吾不
見子矣申包胥曰子其勉之吾未可以助子助子是伐
宗廟也止子是無以為友雖然子亡之我存之於是乎
觀楚一存一亡也後三年吳師伐楚昭王出走申包胥

不受命西見秦伯曰吳無道兵強人衆將征天下始于
楚寡君出走居雲夢使下臣告急哀公曰諾固將圖之
申包胥不罷朝立于秦庭晝夜哭七日七夜不絕聲哀
公曰有臣如此可不救乎興師救楚吳人聞之引兵而
還昭王反復欲封申包胥申包胥辭曰救亡非為名也
功成受賜是賣勇也辭不受遂退隱終身不見詩云凡
民有喪匍匐救之

吳人之入楚楚昭王奔郢鄭公之弟懷將殺王鄭公辛

止之懷曰平王殺吾父在國則君在外則讐也見讐弗
殺非人也鄭公曰夫事君者不為外內行不為豐約舉
苟君之尊卑一也且夫自敵以下則有讐非是不讐下
虐上為殺上虐下為討而況君乎君而討臣何讐之為
若皆讐君則何上下之有乎吾先人以善事君成名於
諸侯自鬬伯比以來未之失也今爾以是殃之不可懷
弗聽曰吾思吾父不能顧矣鄭公以王奔隨王歸而賞
及鄭懷子西諫曰君有二臣或可賞也或可戮也君王

均之羣臣懼矣王曰夫子期之二子邪吾知之矣或禮於君或禮於父均之不亦可乎

楚有士申鳴者在家而養其父孝聞于楚國王欲授之相申鳴辭不受其父曰王欲相汝汝何不受乎申鳴對曰舍父之孝子而為王之忠臣何也其父曰使有祿于國立義于庭汝樂吾無憂矣吾欲汝之相也申鳴曰諾遂入朝楚王因授之相居三年白公為亂殺司馬子期申鳴將往死之父止之曰棄父而死其可乎申鳴曰聞

夫仕者身歸于君而祿歸于親今既去子事君得無死
其難乎遂辭而往因以兵圍之白公謂石乞曰申鳴者
天下之勇士也今以兵圍我吾為之奈何石乞曰申鳴
者天下之孝子也往劫其父以兵申鳴聞之必來因與
之語白公曰善則往取其父持之以兵告申鳴曰子與
吾吾與子分楚國子不與吾子父則死矣申鳴流涕而
應之曰始吾父之孝子也今吾君之忠臣也吾聞之也
食其食者死其事受其祿者畢其能今吾已不得為父

之孝子矣乃君之忠臣也吾何得以全身援桴鼓之遂
殺白公其父亦死王賞之金百斤申鳴曰食君之食避
君之難非忠臣也定君之國殺臣之父非孝子也名不
可兩立行不可兩全也如是而生何面目立於天下遂
自殺也

白公勝將弑楚惠王王出亡令尹司馬皆死拔劍而屬
之於屈廬曰子與我將舍子子不與我必殺子廬曰子
殺叔父而求福於廬也可乎吾聞知命之士見利不動

臨死不恐為人臣者時生則生時死則死是謂人臣之禮故上知天命下知臣道其有可劫乎子胡不推之白公勝乃內其劍 白公勝既殺令尹司馬欲立王子閭以為王王子閭不肯劫之以刃王子閭曰王孫輔相楚國匡正王室而後自庇焉閭之願也今子假威以暴王室殺伐以亂國家吾雖死不子從也白公勝曰楚國之重天下無有天以與子子何不受也王子閭曰吾聞辭天下者非輕其利也以明其德也不為諸侯者非惡其

位也以潔其行也今吾見國而忘主不仁也刳白刃而失義不勇也子雖告我以利威我以兵吾不為也白公強之不可遂殺之葉公高率衆誅白公而反惠王於國屈原者名平楚之同姓也為楚懷王左徒博聞彊志明於治亂嫻於辭令入則與王圖議國事以出號令出則接遇賓客應對諸侯王甚任之上官大夫與之同列爭寵而心害其能懷王使屈原造為憲令屈平屬草藁未定上官大夫見而欲奪之屈平不與因讒之曰王使屈

平為令衆莫不知每一令出平伐其功曰以為非我莫能為也王怒而疏屈平屈平疾王聽之不聰也讒諂之蔽明也邪曲之害公也方正之不容也故憂愁幽思而作離騷離騷者猶離憂也夫天者人之始也父母者人之本也人窮則反本故勞苦倦極未嘗不呼天也疾痛慘怛未嘗不呼父母也屈平正道直行竭忠盡智以事其君讒人間之可謂窮矣信而見疑忠而被謗能無怨乎屈平之作離騷蓋自怨生也國風好色而不淫小雅

怨誹而不亂若離騷者可謂兼之矣上稱帝譽下道齊桓中述湯武以刺世事明道德之廣崇治亂之條貫靡不畢見其文約其辭微其志潔其行廉其稱文小而其指極大舉類邇而見義遠其志潔故其稱物芳其行廉故死而不容自踈濯淖汙泥之中蟬蛻於濁穢以浮游塵埃之外不獲世之滋垢皜然泥而不滓者也推此志也雖與日月爭光可也屈平既絀其後秦欲伐齊齊與楚從親惠王患之乃令張儀佯去秦厚幣委質事楚曰

秦甚憎齊齊與楚從親楚誠能絕齊秦願獻商於之地
六百里楚懷王貪而信張儀遂絕齊使使如秦受地張
儀詐之曰儀與王約六里不聞六百里楚使怒去歸告
懷王懷王怒大興師伐秦秦發兵擊之大破楚師於丹
浙斬首八萬虜楚將屈匄遂取楚之漢中地懷王乃悉
發國中兵以深入擊秦戰於藍田魏聞之襲楚至鄧楚
兵懼自秦歸而齊竟怒不救楚楚大困明年秦割漢中
地與楚以和楚王曰不願得地願得張儀而甘心焉張

儀聞乃曰以一儀而當漢中地臣請往如楚如楚又因厚幣用事者臣靳尚而設詭辯於懷王之寵姬鄭袖懷王竟聽鄭袖復釋去張儀是時屈平既疏不復在位使於齊顧反諫懷王曰何不殺張儀懷王悔追張儀不及其後諸侯共擊楚大破之殺其將唐昧時秦昭王與楚婚欲與懷王會懷王欲行屈平曰秦虎狼之國不可信不如無行懷王稚子子蘭勸王行奈何絕秦歡懷王卒行入武關秦伏兵絕其後因留懷王以求割地懷王怒

不聽亡走趙趙不內復之秦竟死於秦而歸葬長子頃
襄王立以其弟子蘭為令尹楚人既咎子蘭以勸懷王
入秦而不反也屈平既嫉之雖放流瞻顧楚國繫心懷
王不忘欲反冀幸君之一悟俗之一改也其存君興國
而欲反覆之一篇之中三致志焉然終無可奈何故不
可以反卒以此見懷王之終不悟也人君無愚智賢不
肖莫不欲求忠以自為舉賢以自佐然亡國破家相隨
屬而聖君治國累世而不見者其所謂忠者不忠而所

謂賢者不賢也懷王以不知忠臣之分故內惑於鄭袖外欺於張儀疏屈平而信上官大夫令尹子蘭兵挫地削亡其六郡身容死於秦為天下笑此不知人之禍也易曰井泄不食為我心惻可用汲王明並受其福王之不明豈足福哉令尹子蘭聞之大怒卒使上官大夫短屈原於頃襄王頃襄王怒而遷之屈原至於江濱被髮行吟澤畔顏色憔悴形容枯槁漁父見而問之曰子非三閭大夫歟何故而至此屈原曰舉世混濁而我獨清

衆人皆醉而我獨醒是以見放漁父曰夫聖人者不凝
滯於物而能與世推移舉世混濁何不隨其流而揚其
波衆人皆醉何不舖其糟而啜其醕何故懷瑾握瑜而
自令見放為屈原曰吾聞之新沐者必彈冠新浴者必
振衣人又誰能以身之察察受物之汶汶者乎寧赴常
流而葬乎江魚腹中耳又安能以皓皓之白而蒙世之
溫蠖乎乃作懷沙之賦於是懷石遂自投汨羅以死屈
原既死之後楚有宋玉唐勒景差之徒者皆好辭而以

賦見稱然皆祖屈原之從容辭令終莫敢直諫其後楚
日以削數十年竟為秦所滅自屈原沈汨羅後百有餘
年漢有賈生為長沙王太傅過湘水投書以弔屈原

太史公曰余讀離騷天問招魂哀郢悲其志適長沙觀
屈原所自沈淵未嘗不垂涕想見其為人及見賈生吊
之又怪屈原以彼其材游諸侯何國不容而自令若是
讀鵬鳥賦同死生輕去就又爽然自失矣

屈原既放三年不得復見竭智盡忠蔽鄣於讒心煩意

亂不知所從乃往見太卜鄭詹尹曰余有所疑願因先生決之詹尹乃端策拂龜曰君將何以教之屈原曰吾寧悃悃款款朴以忠乎將送往勞來斯無窮乎寧誅鋏草茅以力耕乎將遊大人以成名乎寧正言不諱以危身乎將從俗富貴以媮生乎寧超然高舉以保真乎將呶訾粟斯喔咿嚅唵以事婦人乎寧廉潔正直以自清乎將突梯滑稽如脂如韋以絜楹乎寧昂昂若千里之駒乎將泛泛若水中之鳧乎與波上下偷以全吾軀乎寧

與騏驎亢軛乎將隨駑馬之迹乎寧與黃鵠比翼乎將
與雞鶩爭食乎此孰吉孰凶何去何從世溷濁而不清
蟬翼為重千鈞為輕黃鐘毀棄瓦釜雷鳴讒人高張賢
士無名吁嗟嘿嘿兮誰知吾之廉真詹尹乃釋策而謝
曰夫尺有所短寸有所長物有所不足智有所不明數
有所不逮神有所不通用君之心行君之意龜策誠不
能知此事

中行伯既克鼓以鼓子宛支來令鼓人各復其所非寮

勿從鼓子之臣曰夙沙釐以其孥行軍吏執之辭曰我君是事非事上也名曰君臣豈曰土臣今君實遷臣何賴於鼓穆子召之曰鼓有君矣爾止事君吾定而祿爵對曰臣委質於翟之鼓未委質於晉之鼓也臣聞之委質為臣無有二心委質而策死古之法也君有烈名臣無畔質敢即私利以煩司寇而亂舊法其若不虞何穆子歎而謂其左右曰吾何德之務而有是臣也乃使行既獻言於頃公與鼓子田於河陰使夙沙釐相之

知伯囂之時有士曰長兒子魚絕知伯而去之三年將
東之越而道聞伯囂之見殺也謂御曰還車反吾將死
之御曰夫子絕知伯而去之三年矣今反死之是絕屬
無別也長兒子魚曰不然吾聞仁者無餘愛忠臣無餘
祿吾聞知伯之死而動吾心餘祿之加于我者至今尚
存吾將往依之反而死

智伯與趙襄子戰于晉陽下而死智伯之臣豫讓者恐
以其精氣能使襄主動心乃漆身變形吞炭更聲襄主

將出豫讓偽為死人處于梁下駟馬驚不進襄主動心
使使視梁下得豫讓襄主重其義不殺也又盜為抵罪
被刑人赭衣入繕宮襄主動心則曰必豫讓也襄主執
而問之曰子始事中行君智伯殺中行君子不能死還
反事之今吾殺智伯乃漆身為厲吞炭為啞欲殺寡人
何與先行異也豫讓曰中行君衆人畜臣臣亦衆人事
之智伯朝士待臣臣亦朝士為之用襄子曰非義也子
壯士也乃自置車庫中水漿毋入口者三日以禮豫讓

讓自知遂自殺也

燕昭王使樂毅伐齊閔王亡燕之初入齊也聞蓋邑人
王歎賢令於軍曰環蓋三十里毋入以歎之故已而使
人謂歎曰齊人多高子之義吾以子為將封子萬家歎
固謝燕人燕人曰子不聽吾引三軍而屠蓋邑王歎曰
忠臣不事二君貞女不更二夫齊王不聽吾諫故退而
耕于野國既破亡吾不能存今又劫之以兵為君將是
助桀為暴也與其生而無義固不如烹遂懸其軀於樹

枝自奮絕脰而死齊亡大夫聞之曰王歎布衣義猶不
背齊向燕況在位食祿者乎乃相聚如莒求諸公子立
為襄王

魏攻管而不下安陵人縮高其子為管守信陵君使人
謂安陵君曰君其遣縮高吾將仕之以五大夫使為持
節尉安陵君曰安陵小國也不能必使其民從者自往
請使道使者至縮高之所復信陵君之命縮高曰君之
幸高也將使高攻管也夫以父攻子守人大笑也見臣

而下是背王也父教子背亦非君之所喜也敢再拜辭
使者以報信陵君信陵君大怒遣大使之安陵曰安陵
之地亦猶魏也今吾攻管而不下則秦兵及我社稷必
危矣願君之生東縮高而致之若君弗致無忌將發十
萬之帥以告安陵之城安陵君曰吾先君成侯受詔襄
王以守此地也手受大府之憲憲之上篇曰子弑父臣
弑君有常刑不赦國雖大赦降城亡子不得與焉今縮
高謹雖辭大位以全父子之義而君曰必生致之是我

負襄王之詔而廢大府之憲也雖死終不敢行縮高聞之曰信陵君為人悍而自用也此辭反必為國禍吾已全已無為人臣之義也豈可使吾君有魏患也乃之使者之舍刎頸而死信陵君聞縮高死服縞素避舍使使謝安陵君曰無忌小人也困於思慮失言於君再拜釋罪

漢蘇武字子卿少以父任兄弟並為郎稍遷至移中廡監時漢連伐胡數通使相窺觀匈奴留漢使郭吉路充

國前後十餘輩匈奴使來漢亦留之以相當天漢元年
且鞮侯單于初立恐漢襲之乃曰漢天子我丈人行也
盡歸漢使路充國等武帝嘉其義乃遣武以中郎將使
持節送匈奴使留在漢者因厚賂單于答其善意武與
副中郎將張勝及假吏常惠等募士斥堠百餘人俱旣
至匈奴置幣遺單于單于益驕非漢所望也方欲發使
送武等會緄王與長水虞常等謀反匈奴中緄王者昆
邪王姊子也與昆邪王俱降漢後隨浞野侯沒胡中及

衛律所將降者陰相與謀劫单于母閼氏歸漢會武等至匈奴虞常在漢時素與副張勝相知私候勝曰聞漢天子甚怨衛律常能為漢伏弩射殺之吾母與弟在漢幸蒙其賞賜張勝許之以貨物與常後月餘单于出獵獨閼氏子弟在虞常等七十餘人欲發其一人夜亡告之单于子弟發兵與戰緱王等皆死虞常生得单于使衛律治其罪張勝聞之恐前語發以狀語武武曰事如此此必及我見犯乃死重負國欲自殺勝惠共止之虞

常果引張勝单于怒召諸貴人議欲殺漢使者左伊秩
訾曰即謀单于何以復加宜皆降之单于使衛律召武
受辭武謂惠等屈節辱命雖生何面目以歸漢引佩刀
自刺衛律驚自抱持武馳召鑿鑿地為坎置煨火覆武
其上蹈其背以出血武氣絕半日復息惠等哭輿歸營
单于壯其節朝夕遣人候問武而收繫張勝武益愈单
于使使曉武會論虞常欲因此時降武劍斬虞常已律
曰漢使張勝謀殺单于近臣當死单于募降者赦罪舉

劍欲擊之勝請降律謂武曰副有罪當相坐武曰本無
謀又非親屬何謂相坐復舉劍擬之武不動律曰蘇君
律前負漢歸匈奴幸蒙大恩賜號稱王擁衆數萬馬畜
彌山富貴如此蘇君今日降明日復然空以身膏草野
誰復知之武不應律曰君因我降與君為兄弟今不聽
吾計後雖欲復見我尚可得乎武罵律曰女為人臣子
不顧恩義畔主背親為降虜于蠻夷何以女為見且單
于信女使決人死生不平心持正反欲鬪兩主觀禍敗

南越殺漢使者屠為九郡宛王殺漢使者頭懸北闕朝
鮮殺漢使者即時誅滅獨匈奴未耳若知我不降明欲
令兩國相攻匈奴之禍從我始矣律知武終不可脅白
单于单于愈益欲降之乃幽武置大窖中絕不飲食天
雨雪武卧齧雪與旃毛并咽之數日不死匈奴以為神
乃徙武北海無人處使牧羝羝乳乃得歸別其官屬
常惠等各置他所武至海上廩食不至掘野鼠去草實
食之杖漢節牧羊臥起操持節旄盡落積五六年单于

弟於軒王弋射海上武能網紡繳繫弓弩於軒王愛之
給其衣食三歲餘王病賜武馬畜服匿宮廬王死後人
衆徙去其冬丁令盜武牛羊武復窮厄初武與李陵俱
為侍中武使匈奴明年陵降不敢求武久之单于使陵
至海上為武置酒設樂因謂武曰单于聞陵與子卿素
厚故使陵來說足下虛心欲相待終不得歸漢空自苦
亡人之地信義安所見乎前長君為奉車從至雍棧陽
宮扶輦下除觸柱折轅劾大不敬伏劍自刎賜錢二百

萬以葬孺卿從祀河東后土官騎與黃門駙馬爭船推墮駙馬河中溺死官騎亡詔使孺卿逐捕不得惶恐飲藥而死來時太夫人不幸陵送葬至陽陵子卿婦年少聞已更嫁矣獨有女弟二人兩女一男今復十餘年存亡不可知人生如朝露何久自苦如此陵始降時忽忽如狂自痛負漢加以老母係保宮子卿不欲降何以過陵且陛下春秋高法令亡常大臣亡罪夷滅者數十家安危不可知子卿尚復誰為乎願聽陵計勿復有云武

曰武父子亡功德皆為陛下所成就位列將爵通侯兄弟親近常願肝腦塗地今得殺身自效雖蒙斧鉞湯鑊誠甘樂之臣事君猶子事父也子為父死無所恨願勿復再言陵與武飲數日復曰子卿一聽陵言武曰自分已死久矣王必欲降武請畢今日之驩效死于前陵見其至誠喟然嘆曰嗟乎義士陵與衛律之罪上通于天因泣下霑襟與武訣去陵惡自賜武使其妻賜武牛羊數十頭後陵復至北海上語武區脫捕得雲中生口言

太守以下吏民皆白服曰上崩武聞之南鄉號哭歐血
旦夕臨數月昭帝即位數年匈奴與漢和親漢求武等
匈奴詭言武死後漢使復至匈奴常惠請其守者與俱
得夜見漢使具自陳道教使者謂单于言天子射上林
中得鴈足有繫帛書言武等在某澤中使者大喜如惠
語以讓单于单于視左右而驚謝漢使曰武等實在于
是李陵置酒賀武曰今足下還歸揚名于匈奴功顯于
漢室雖古竹帛所載丹青所畫何以過子卿陵雖驚怯

令漢且賞陵罪全其老母使得奮大辱之積志庶幾乎
曹柯之盟此陵宿昔之所不忘也收族陵家為世大戮
陵尚復何顧乎已矣令子卿知吾心耳異域之人一別
長絕陵起舞歌曰徑萬里兮度沙漠為君將兮奮匈奴
路窮絕兮矢刃摧士衆滅兮名已隕老母已死雖欲報
恩將安歸陵泣下數行因與武決單于召會武官屬前
以降及物故凡隨武還者九人武以始元六年春至京
師詔武奉一太牢謁武帝園廟拜為典屬國秩中二千

石賜錢二百萬公田二頃宅一區常惠徐聖趙終根皆
拜為中郎賜帛各二百疋其餘六人老歸家賜錢八十
萬復終身常惠後至右將軍封列侯武留匈奴九十九
歲始以強壯出及還鬚髮盡白

任延拜武威太守光武親見戒之曰善事上官無失名
譽延對曰臣聞忠臣不私私臣不忠履正奉公臣子之
節上下雷同非陛下之福善事上官臣不敢奉詔帝嘆
息曰卿言是也

溫序字次房太原祁人也仕州從事光武時騎都尉弓
里戍將兵平定北州到太原歷訪英俊大人問以策謀
戍見序奇之上疏薦焉于是徵為侍御史遷武陵都尉
病免官六年拜謁者遷護羌校尉序行部至襄武為隗
囂別將苟宇所拘劫宇謂序曰子若與我并威同力天
下可圖也序曰受國重任分當效死義不貪生苟背恩
德宇等復曉譬之序素有氣力大怒叱宇等曰虜何敢
迫脇漢將因以節撻殺數人宇止之曰此義士死節可

賜以劍序受劍銜鬚于口顧左右曰既為賊所迫殺無
令鬚汙血遂伏劍而死

范曄李固傳論 夫稱仁者其道弘矣立言踐行豈徒
徇名安已而已哉將以定去就之槩正天下之風使生
與理全死與義合也夫專為義則傷生專為生則蹇義
專為物則害智專為已則損仁若義重于生舍生可也
生重于義全生可也上以殘闇失君道下以篤固盡臣
節臣節盡而死之則為殺身以成仁去之不為求生以

害仁也順桓之間國統三絕太后稱制賊臣虎視李固
據位持重以爭大義確乎而不可奪豈不知守節之觸
禍恥夫覆折之傷任也觀其發正辭及所遺梁冀書雖
機失謀乖猶戀戀而不能已至矣哉社稷之心乎其顧
視胡廣趙戒猶糞土也

獻帝遷許徵徐璆為廷尉徵當詣京師道為袁術所劫
授璆以上公之位璆乃嘆曰冀勝鮑宣獨何人哉守之
必死術不敢逼術死軍破璆得其盜國璽及還許上之

并送前所假汝南東海二郡印綬司徒趙溫謂瑒曰君
遭大難猶存此邪瑒曰昔蘇武困于匈奴不墜七尺之
節況此方寸印乎

刺史耿鄙委任治中程球球為通奸利士人怨之中平
四年鄙率六郡兵討金城賊王國韓遂等傳變知鄙失
衆必敗諫曰使君統政日淺人未知教孔子曰不教人
戰是謂棄之今率不習之人越大隴之阻將十舉十危
而賊聞大軍將至必萬人一心邊兵多勇其鋒難當而

新合之衆上下未和萬一內變雖悔無及不若息軍養德明賞必罰賊得寬挺必謂我怯羣惡爭執其離可必然後率已教之人討成擒之賊其功可坐而待也今不為萬全之福而就必危之勢竊為使君不取鄙不從行至狄道果有反者先殺程球次害鄙賊遂進圍漢陽城中兵少糧盡變猶固守時北胡騎數千隨賊攻郡皆夙懷變恩共于城外叩頭求送變歸鄉里子幹年十三從在官舍知變性剛有高義恐不能屈志以免進諫曰國

家昏亂遂令大人不容于朝今天下已叛而兵不足自守鄉里羌胡先被恩德欲令棄郡而歸願必許之徐至鄉里率厲義徒見有道而輔之以濟天下言未終變慨然而嘆呼幹小字曰別成汝知吾必死耶蓋聖達節次守節且殷紂之暴伯夷不食周粟而死仲尼稱其賢今朝廷不甚殷紂吾德亦豈絕伯夷世亂不能養浩然之志食祿又欲避其難乎吾行何之必死于此汝有才智勉之勉之主簿楊會吾之程嬰也幹哽咽不能復言左

右皆泣下王國使故酒泉太守黃衍說變曰成敗之事
已可知矣先起上有伯王之業下成伊呂之勲天下非
復漢有府君寧有意為吾屬師乎變案劍叱衍曰若剖
符之臣反為賊說耶遂麾左右進兵臨陣戰歿謚曰壯
節侯幹知名位至扶風大守

范曄孔融傳論 昔諫大夫鄭昌有言山有猛獸者藜
藿為之不採是以孔父正色不容弑虐之謀平仲立朝
有紓盜齊之望若夫文舉之高志直情真足以動義槩

而忤雄心故使移鼎之迹事隔于人存代終之規啓機于身後也夫嚴氣正性覆折而已豈有負園委屈可以每其生哉懍懍焉皜皜焉其與琨玉秋霜比質可也

晉書忠義傳論 古人有言君子殺身以成仁不求生以害仁又云非死之難處死之難信哉斯言也是知殞節苟合其宜義夫豈吝其沒捐軀若得其所烈士不愛其存故能守鐵石之深衷厲松筠之雅操見貞心于歲暮標勁節于嚴風赴鼎鑊其如歸履危亡而不顧書名

竹帛畫象丹青前史以為美談後來仰其徽烈者也晉
自元康之後政亂朝昏禍難洊興艱虞孔熾遂使奸凶
放命戎狄交侵函夏沸騰蒼生塗炭干戈日用戰爭方
興雖背恩忘義之徒不可勝載而蹈節輕生之士無乏
于時至若嵇紹之衛難乘輿卞壺之亡軀鋒鏑桓雄之
義高田叔周崎之節邁解揚羅丁致命于舊君辛吉恥
臣于戎虜張禕引鳩以全節王諒斷臂以厲忠莫不志
烈秋霜精貫白日足以激清風于萬古厲薄俗于當年

者歟所謂亂世識忠臣斯之謂也卞壺劉超鍾雅周虓等已入列傳其餘卽叙其行事以為忠義傳用旌晉氏之有人焉

周處遷御史中丞凡所糾劾不避寵戚梁王彤違法處深文按之及氐人齊萬年反朝臣惡處彊直皆曰處吳之名將子也忠烈果毅乃使隸夏侯駿西征伏波將軍孫秀知其將死謂之曰卿有老母可以此辭也處曰忠孝之道安得兩全既辭親事君父母復安得而子乎今

日是我死所也萬年聞之曰周府君昔臨新平我知其
為人才兼文武若專斷而來不可當也如受制于人此
成擒耳既而梁王彤為征西大將軍都督關中諸軍事
處知彤不平必當陷已自以人臣盡節不宜辭憚乃悲
慨即路志不生還中書令陳準知彤將還宿憾乃言于
朝曰駿及梁王皆貴戚非將帥之才進不求名退不
畏咎周處吳人忠勇果勁有怨無援將必喪身宜詔孟
觀以精兵萬人為處前鋒必能殄寇不然彤當使處前

驅其敗必也朝廷不從時賊屯梁山有衆七萬而駿逼處以五千兵擊之處曰軍無後繼必至覆敗雖在亡身為國取恥彤復命處進討乃與振威將軍盧播雍州刺史解系攻萬年于六陌將戰處軍人未食彤促令速進而絕其後繼處知必敗賦詩曰去去世事已策馬觀西戎藜藿甘梁黍期之克令終言畢而戰自旦及暮斬首萬計弦絕矢盡播系不救左右勸退處按劍曰此是吾效節受命之日何退之為且古者良將受命函門以出

盖有進無退也今諸軍負信勢必不振我為大臣以身殉國不亦可乎遂力戰而沒

河間王顥成都王穎舉兵向京都以討長沙王又大駕次于城東又宣言于衆曰今日西討欲誰為都督乎六軍之士皆曰願嵇侍中戮力前驅死猶生也遂拜嵇紹使執節平西將軍屬又被執紹復為侍中公王以下皆詣鄴謝罪于穎紹等咸見廢黜免為庶人尋而朝廷復有北征之役徵紹復其爵位紹以天子蒙塵承詔馳詣

行在所值王師敗績于蕩陰百官及侍衛莫不散潰唯
紹儼然端冕以身捍衛兵交御輦飛箭雨集紹遂被害
于惠帝側血濺御服天子深哀嘆之及事定左右欲浣
衣帝曰此穉侍中血勿去初紹之行也侍中秦準謂曰
今日向難卿有佳馬否紹正色曰大駕親征以正伐逆
理必有征無戰若使皇輿失守臣節有在駿馬何為聞
者莫不嘆息

劉沉軍敗率餘卒屯于故營張方遣其將敦偉夜至沉

軍大驚而潰與麾下百餘人南遁為陳倉令所執沉謂
河間王顥曰夫知己之顧輕在三之節重不可違君父
之詔量強弱以苟全投袂之日期之必死菹醢之戮甘
之如薺辭義慷慨見者哀之顥怒鞭之而後腰斬

周虓字孟威少有節操州名為祭酒後歷位至西夷校
尉領梓潼太守寧康初將堅將楊安寇梓潼虓固守涪
城遣步騎數千送母妻從漢水將抵江陵為堅將朱彤
邀而獲之虓遂降于安堅欲以為尚書郎虓曰蒙國厚

思以至今日但老母見獲失節于此母子獲全秦之惠也雖公侯之貴不以為榮況郎任乎堅乃止自是每入見堅輒箕踞而坐呼之為氏賊堅不悅屬元會威儀甚整堅因謂虓曰晉家元會何如此虓攘袂厲聲曰戎狄集聚辟猶犬羊相羣何敢比天子及呂光征西域堅出餞之戎士二十萬旌旗數百里又問虓曰朕衆力何如虓曰戎夷已來未之有也堅黨以虓不遜屢請除之堅待之彌厚虓乃密書與桓冲說賊奸計虓潛至漢中堅

追得之後又與堅兄子苞謀襲堅事泄堅引虓問其狀
虓曰昔漸離豫讓燕智之微臣猶漆身吞炭不忘忠節
況虓世荷晉恩豈敢忘也生為晉臣死為晉鬼復何問
乎堅曰今殺之適成其名矣遂撻之徙于太原後堅復
陷順陽魏興獲二守皆執節不撓堅嘆曰周益威不屈
于前丁彥遠潔已于後吉祖冲不食而死皆忠臣也虓
竟以病卒于太原其子興迎致其喪冠軍將軍謝玄親
臨哭之因上疏曰臣聞旌善表功崇義明節所以振揚

聲教垂美來葉故西夷校尉梓潼太守周虓執心忠烈厲節寇庭遂嬰禍荒裔痛寘泉壤臣每悲其志以為蘇武之賢不復過也前宣告并州訪求虓喪并索其家負荷數千始得來至即以資送還其舊隴伏願聖朝追其忠心表其殊節使負霜之志不墜于地則榮慰存亡惠被顯幽矣孝武帝詔曰虓厲志貞亮無愧古烈未及拔身奄隕厥命甄表義節國之典也贈龍驤將軍益州刺史賻錢二十萬布百匹又贍賜其家

王敦構逆温嶠謂周顛曰大將軍此舉似有所在當無
濫邪顛曰君少年未更事人主自非堯舜何能無失人
臣豈可得舉兵以脅主共相推戴未能數年一旦如此
豈云非亂乎處仲剛愎彊忍狼抗無上其意寧有限邪
既而王師敗績顛奉詔詣敦敦曰伯仁卿負我顛曰公
戎車犯順下官親率六軍不能其事使王旅奔敗以此
負公敦憚其辭正不知所荅帝召顛于廣室謂之曰近
日大事二宮無恙諸人平安大將軍故副所望耶顛曰

二宮自如明詔于臣等故未可知護軍長史郝嘏等勸
顓避敦顓曰吾備位大臣朝廷喪敗寧可復草間求活
外投胡越耶俄而與戴若思俱被收路經太廟顓大言
曰天地先帝之靈賊臣王敦傾覆社稷殺忠臣陵虐天
下神祇有靈當速殺敦無令縱毒以傾王室語未終收
人以戟傷其口血流至踵顏色不變容止自若觀者皆
為流涕遂于石頭南門外石上害之時年五十四顓之
死也敦坐有一參軍擣捕馬於博頭被殺因謂敦曰周

家奕世令望而位不至公及伯仁將登而墜有似下官
此馬敦曰伯仁總角于東宮相遇一面披襟便許之三
事何圖不幸自貽王法敦素憚顛每見顛輒面熱雖復
冬月扇面手不得休敦使繆坦籍顛家收得素簏數枚
盛故絮而已酒五甕米數石在位者服其清約敦卒後
追贈左光祿大夫儀同三司謚康祀以少牢

辛勉字伯力隴西狄道人也父洪左衛將軍勉博學有
貞固之操懷帝世累遷為侍中及洛陽陷隨帝至平陽

劉聰將署為光祿大夫勉固辭不受聰遣其黃門侍郎
喬度齎藥酒逼之勉曰大丈夫豈以數年之命而虧高
節事二姓下見武皇帝哉引藥將飲度遽止之曰主上
相試耳君真高士也嘆息而去聰嘉其貞節深敬異之
為築室于平陽西山月致酒米勉亦辭而不受年八十
卒勉族弟賓愍帝時為尚書郎及帝蒙塵于平陽劉聰
使帝行酒洗爵欲觀晉臣在朝者意賓起而抱帝大哭
聰曰前殺庾珉輩故不足為戒邪引出遂加害焉

庾亮將徵蘇峻言于朝曰峻狼子野心終必為亂今日徵之縱不順命為禍猶淺若復經年為惡滋蔓不可復制此是晁錯勸漢景帝早削七國事也當時議者無以易之卞壺固爭謂亮曰峻擁彊兵多歲無賴且逼近京邑路不終朝一旦有變易為蹉跌宜深思遠慮恐未可倉卒亮不納壺知必敗與平南將軍溫嶠書曰元規召峻意定懷此於邑溫生足下奈此事何吾今所慮是國之大事且峻已出狂意而召之更速必縱其羣惡以向

朝廷朝廷威力誠桓桓交須接鋒履刃尚不知便可即
擒不王公亦同此情吾與之爭甚慊切不能如之何本
出足下為外藩任而今恨出足下在外若卿在內俱諫
必當相從今內外戒嚴四方有備峻凶狂必無所至耳
恐不能使無傷如何壺司馬任台勸壺宜畜良馬以備
不虞壺笑曰以逆順論之理無不濟若萬一不然豈須
馬哉峻果稱兵壺復為尚書令右將軍領右衛將軍餘
官如故峻至東陵口詔以壺都督大桁東諸軍事假節

復加領軍將軍給事中壺率郭默趙盾等與峻大戰于陵西為峻所破壺與鍾雅皆退還死傷者千數壺雅並還節詣闕謝罪峻進攻青溪壺與諸軍距擊不能禁賊放火燒宮寺六軍敗績壺時發背創猶未合力疾而戰率厲散衆及左右吏數百人攻賊麾下苦戰遂死之時年四十八二子矜盱見父沒相隨赴賊同時見害峻平朝議贈壺左光祿大夫加散騎常侍尚書郎弘訥議以為死事之臣古今所重下令忠貞之節當書于竹帛今

之追贈實未副衆望謂宜加鼎司之號以旌忠烈之勲
司徒王導見議進贈驃騎將軍加侍中訥重議曰夫事
親莫大于孝事君莫尚于忠唯孝也故能盡敬竭誠唯
忠也故能見危授命此在三之大節臣子之極行也案
壺委質三朝盡規翼亮遭世險難存亡以之受顧託之
重居端右之任擁衛至尊則有保傅之恩正色在朝則
有匪躬之節賊峻造逆戮力致討身當矢旡再對賊鋒
父子并命可謂破家為國守死勤事昔許男疾終猶蒙

二等之贈況壺伏節國難者乎夫賞疑從重況在不疑
可謂上準許穆下同嵇紹則允合典謨克厭衆望于是
改贈壺侍中驃騎將軍開府儀同三司謚曰忠貞祠以
太牢贈世子瞻散騎侍郎瞻弟盱奉車都尉瞻母裴氏
撫二子尸哭曰父為忠臣汝為孝子夫何恨乎徵士翟
湯聞之曰父死于君子死于父忠孝之道萃于一門
蘇峻之難成帝詔鍾雅為前鋒監軍假節領精勇千人
以距峻雅以兵少不敢擊退還拜侍中尋王師敗績雅

與劉超並侍衛天子或謂雅曰見可而進知難而退古之道也君性亮直必不容于寇讎何不隨時之宜而坐待其斃雅曰國亂不能匡君危不能濟各遜遁以求免吾懼董狐執簡而至矣庾亮臨去顧謂雅曰後事深以相委雅曰棟折榱崩誰之責也亮曰今日之事不容復言卿當期剋復之效耳雅曰想足下不愧荀林父耳及蘇峻逼遷車駕幸石頭雅超流涕步從明年為賊所害桓彝為宣城内史在郡有惠政為百姓所懷蘇峻之亂

也彛糾合義衆欲赴朝廷其長史裨惠以郡兵寡弱山人易擾可案甲以須後舉彛厲色曰夫見無禮于其君者若鷹鷂之逐鳥雀今社稷危逼義無晏安乃遣將軍朱綽討賊別帥于蕪湖破之彛尋出石頭會朝廷遣將軍司馬流先據慈湖為賊所破遂長驅逕進彛以郡無堅城遂退據廣德尋王師敗績彛聞而慷慨流涕進屯涇縣時州郡多遣使降峻裨惠又勸彛偽與通和以紓交至之禍彛曰吾受國厚恩義在致死焉能忍垢蒙辱

與醜逆通問如其不濟此則命也遣將軍俞縱守蘭若峻遣將韓晃攻之縱將敗左右勸縱退軍縱曰吾受桓侯厚恩本以死報吾之不可負桓侯猶桓侯之不負國也遂力戰而死晃進軍攻彛彛固守經年勢孤力屈賊曰彛若降者當待以優禮將士多勸彛偽降更思後舉彛不從辭氣壯烈志節不撓城陷為晃所害

易雄為春陵令刺史譙王承既距王敦將謀起兵以赴朝廷雄承符馳檄遠近列敦罪惡宣募縣境數日之中

有衆千人負糧荷戈而從之承既固守而湘中殘荒之後城池不完兵資又闕敦遣魏乂李恒攻之雄勉厲所統扞禦累旬士卒死傷者相枕力屈城陷為乂所虜意氣慷慨神無懼色送到武昌敦遣人以檄示雄而數之雄曰此實有之惜雄位微力弱不能救國之難王室如燬雄安用生為今日即戮得作忠鬼乃所願也敦憚其辭正釋之衆人皆賀雄笑曰昨夜夢乘車挂肉其傍夫肉必有筋筋者斤也車傍有斤吾其戮乎尋而敦遣殺

之當時見者莫不傷惋

虞悝長沙人也弟望字子都並有士操孝悌廉信為鄉黨所稱而俱好臧否以人倫為己任少仕州郡兄弟更為治中別駕元帝為丞相招延四方之士多辟府掾時人謂之百六掾望亦被召恥而不應譙王承臨州知其名檄悝為長史未到遭母喪會王敦作逆承往弔悝因留與語曰吾前被詔遣鎮此州正以王敦專擅防其為禍今敦果為逆謀吾受任一方欲率所領馳赴朝廷而

衆少糧乏且始到貴州恩信未著卿兄弟南夏之翹雋而智勇遠聞古人墨經即戎況今鯨鯢塞路王室危急安得遂罔極之情忘忠義之節乎如今起事將士器械可以濟不悝望對曰王敦居分陝之任一且構逆圖危社稷此天地所不容人神所忿疾大王不以猥劣枉駕訪及悝兄弟並受國恩敢不自奮今天朝中興人思晉德大王以宗子之親奉信順而誅有罪孰不荷戈致命但鄙州荒弊糧器空竭舟艦寡少難以進討宜且收衆

固守傳檄四方其勢必分然後圖之事可捷也承以為然乃命惺為長史望為司馬督護諸軍湘東太守鄭澹敦之姊夫也不順承旨遣望討之望率眾一旅直入郡斬澹以徇四境及魏又來攻望每先登力戰而死城破惺復為人所執將害之子弟對之號泣惺謂曰人生有死闔門為忠義鬼亦何恨哉及王敦平贈惺襄陽太守望滎陽太守遣謁者至墓祭以少牢

羅企生字宗伯豫章人也多才藝初拜佐著作郎以家

貧親老求補臨汝令刺史王凝之請為別駕殷仲堪之
鎮江陵引為功曹累遷武陵太守未之郡而桓玄攻仲
堪仲堪更以企生為諮議叅軍仲堪多疑少決企生深
憂之謂弟遵生曰殷侯仁而無斷事必無成成敗天也
吾當死生以之仲堪果走文武無送者唯企生從馬路
經家門遵生曰作如此分離何可不執手企生迴馬授
手遵生有勇力便牽下之謂曰家有老母將欲何之企
生揮淚曰今日之事我必死之汝等奉養不失子道一

門之中有忠與孝亦復何恨遵生抱之愈急仲堪于路待之企生遙呼曰生死是同願少見待仲堪見企生無脫理策馬而去至荆州人士無不詣者企生獨不往而營理仲堪家或謂之曰玄猜忍之性未能取卿誠節若遂不詣禍必至矣企生正色曰我是殷侯吏見遇以國士為弟以力見制遂不我從不能共殄醜逆致此奔敗亦何面目復就桓求生乎玄聞之大怒然素待企生厚先遣人謂曰若謝我當釋汝企生曰為殷州吏荆州

奔亡存亡未判何顏復謝玄即收企生遣人問欲何言
荅曰文帝殺嵇康嵇紹為晉忠臣從公乞一弟以養老
母玄許之又引企生于前謂曰吾相遇甚厚何以見負
今者死矣企生對曰使君既興晉陽之甲軍次尋陽並
奉王命各還所鎮升壇盟誓口血未乾而生奸計自傷
力劣不能翦滅凶逆恨死晚也玄遂害之時年三十七
衆咸悼焉先是玄以羔裘遺企生母胡氏及企生遇害
即日焚裘

周帝招齊東雍州刺史傅伏不從既克并州復遣韋孝寬招之令其子以上大將軍武鄉公告身賜伏伏不受謂孝寬曰事君有死無二此兒為臣不能竭忠為子不能盡孝人所讎疾願速斬之以號令天下周帝自鄴還至晉州遣高阿那肱等百餘人臨汾召伏伏出軍隔水相見問至尊在何處阿那肱曰已被擒矣伏仰天大哭帥眾入城于廳事前北面哀號良久然後出降周帝見之曰何不早下伏流涕對曰臣三世為齊臣食齊祿不

能自死羞見天地周帝執其手曰為臣當如此乃以所食羊肋骨賜伏曰骨親肉踈所以相付遂引使宿衛授上儀同大將軍勅之曰若即與公高官恐歸投者心動努力好行不愁不富貴又問前救河陰得何官職伏曰蒙一轉授特進永昌郡開國公周帝謂後主曰朕三年教戰決取河陰正為傳伏善守城不可動遂斂軍而退公當時賞授何其薄也

王軌聞鄭譯用事自知及禍謂所親曰吾昔在先朝實

申社稷至計今日之事斷可知矣此州控帶淮南鄰接
疆寇欲為身計易如反掌但忠義之節不可虧違況荷
先帝厚恩豈可以獲罪于嗣主遽忘之耶正可于此待
死冀千歲之後知吾心耳周主從容問譯曰我腳上杖痕
誰之為也對曰事由宇文孝伯及王軌因言軌將鬚事
周主遣使殺軌內史元巖不肯署詔御正中大夫顏之
儀切諫不聽巖從脫巾頓顙三拜三進周主曰汝欲黨
軌耶巖曰臣非黨軌正恐濫誅失天下之望周主怒使

閻豎搏其面軌遂死巖亦廢于家周主之為太子也尉
遲運為宮正數進諫不用至是謂宇文孝伯曰吾徒必
不免禍為之奈何孝伯曰今堂上有老母地下有武帝
為臣為子知欲何之且委質事人本徇名義諫而不入
死焉可逃足下若為身計宜且遠之于是運求出為秦
州總管他日周主託以齊王憲事讓孝伯曰公知齊王
謀反何以不言對曰臣知齊王忠于社稷為羣小所譖
言必不用所以不言且先帝付囑微臣唯令輔導陛下

今諫而不從寔負顧託以是為罪是所甘心周主大慙命將出賜死運至秦州亦以憂死

唐天后時裴匪躬坐私謁皇嗣腰斬于市自是公卿以下皆不得見又有告皇嗣潛有異謀者太后命來俊臣鞠其左左右不勝楚毒皆欲自誣太常工人安金藏大呼曰請剖心以明皇嗣不反即引佩刀自剖其胸五臟出太后聞之令舉入宮使醫內五臟以桑皮線縫之傳以藥經宿始蘇太后親臨視之嘆曰吾有子不能自

明使汝至此即命俊臣停推睿宗由是得免

顏杲卿起兵纔八日守備未完史思明蔡希德引兵至城下杲卿告急于王承業承業擁兵不救杲卿晝夜拒戰糧盡矢竭城遂陷賊執杲卿及袁履謙等送洛陽承業使者至京師拜承業羽林大將軍麾下受官爵者以百數徵顏杲卿為衛尉朝命未至而常山已陷矣杲卿至洛陽祿山數之曰我奏汝為判官不數年起至太守何負于汝而反杲卿罵曰汝本營州牧羊羯奴天子擢

汝為三道節度使恩幸無比何負于汝而反我世為唐臣祿位皆唐有雖為汝所奏豈從汝反耶我為國討賊恨不斬汝何謂反也臊羯狗何不速殺我祿山大怒并履謙縛而弔之二人比死罵不絕口

令狐潮攻雍丘潮與張巡有舊于城下相勞苦如平生潮因說巡曰天下事去矣足下堅守危城欲誰為乎巡曰足下平生以忠義自許今日之舉忠義何在潮慚而退圍守四十餘日朝廷聲問不通潮聞上皇已幸蜀復

以書招巡大將六人白巡以兵勢不敵且上存亡不可
知不如降賊巡陽許諾明日堂上設天子畫像帥將士
朝之人人皆泣引六將于前責以大義斬之士心益勸
城中矢盡巡縛藁為人千餘被以黑衣夜縋城下潮兵
爭射之得矢數十萬其後復夜縋人賊笑不設備乃以
死士五百斫潮營潮軍大亂焚壘而遁追奔十餘里潮
益兵圍之巡使郎將雷萬春于城上與潮相聞語未絕
賊弩射之面中六矢而不動潮疑其木人使諜問之乃

大驚遙謂巡曰向見雷將軍方知足下軍令矣然其如天道何巡謂之曰君未識人倫焉知天道未幾出戰擒賊十四人斬首百餘級賊乃夜遁自是數擊破賊軍分別其衆凡胡兵悉斬之協從者皆令歸業旬日間民去賊來歸者萬餘戶

盧杞惡太子太師顏真卿欲出之真卿謂曰先中丞傳首至平原真卿以舌舐面血今相公忍不相容乎杞矍然起拜而恨之益深至是李希烈陷汝州德宗問計于

杞杞對曰誠得儒雅重臣為陳禍福可不勞軍旅而服
顏真卿三朝舊臣忠直剛決名重海內人所信服真其
人也德宗以為然遣真卿宣慰希烈詔下舉朝失色真
卿乘驛至東郡留守鄭叔則曰往必不免宜少留須後
命真卿曰君命也將焉避之遂行李勉表言失一元老
為國家羞又使人邀之于道不及真卿與其子書但敕
以奉家廟撫諸孤而已至許欲宣詔旨希烈使其養子
千餘環繞嫚罵拔刃擬之真卿色不變希烈麾眾令退

館而禮之欲遣還會李元平在座真卿責之元平慙以
密啟白希烈遂留不遣朱滔等各遣使詣希烈勸進希
烈召真卿示之曰四王見推不謀而同豈吾獨為朝廷
所忌無所自容耶真卿曰此乃四凶何謂四王相公不
自保功業為唐忠臣乃與亂臣賊子相從求與之同覆
滅邪希烈不悅他日又與四使同宴四使曰都統將稱
大號而太師適至是天以宰相使都統也真卿叱之曰
汝知有罵安祿山而死者顏杲卿乎乃吾兄也吾年八

十知守節而死耳豈受汝曹誘脇乎希烈掘坎于庭云
欲阮之真卿怡然見希烈曰死生已定何必多端亟以
一劍相與豈不快公心事耶希烈乃謝之

魯鞏撫州顏魯公祠堂記 贈司徒魯郡顏公諱真卿
事唐為太子太師與其從父兄杲卿皆有大節以死至
今雖小夫婦人皆知公之為烈也初公以忤楊國忠斥
為平原太守知安祿山必反為之備祿山既舉兵公與
常山太守杲卿伐其後賊之不能直窺潼關以公與杲

卿抗其勢也在肅宗時數正言宰相不悅斥去之又為御史唐旻所搆連輒斥李輔國遷太上皇居西宮公首率百官請問起居又輒斥代宗時與元載爭論是非載欲有所壅蔽公極論之又輒斥楊炎盧杞既相德宗益惡公所為連斥之猶不滿意李希烈陷汝州杞即以公使希烈希烈初慙其言後卒縊公以死是時公年七十有七矣天寶之際久不見兵祿山既反天下莫不震動公獨以區區平原遂折其鋒四方聞之爭奮而起唐卒

以振者公為之倡也當公之開玉門同日歸公者十七郡得兵二十餘萬繇此觀之苟順且誠天下從之矣自此至公沒垂三十年小人繼續任政天下日入於敝大盜繼起天子輒出避之唐之在朝臣多畏怯觀望能居其間一忤於世失所而不自悔者寡矣至於再三忤於世失所而不自悔者蓋未之有也若至於起且仆以至於七八遂死而不自悔者則天下一人而已若公是也公之學問文章徃徃雜於神仙浮屠之說不皆合於理

及其奮然自立能至於此者蓋天性然也故公之能處其死不足以觀公之大何則及至於勢窮義有不得不死雖中人可勉焉況公之自信也歟惟歷忤大奸顛跌撼頓至於七八而始終不以死生禍福為秋毫顧慮非篤於道者不能如此此足以觀公之大也夫世之治亂不同而士之去就亦異若伯夷之清伊尹之任孔子之時彼各有義夫既自比於古之任者矣乃欲睽顧回隱以市於世其可乎故孔子惡鄙夫不可以事君而多殺

身以成仁者若公非孔子所謂仁者歟今天子至和三
年尚書都官郎中知撫州聶君厚載尚書屯田員外郎
通判撫州林君慥相與慕公之烈以公之嘗為此邦也
遂為堂而祠之既成二君過予之家而告之曰願有述
夫公之赫赫不可蓋者固不係於祠之有無蓋人之向
往之不足者非祠則無以致其志也聞其烈足以感人
況拜其祠而親炙之者歟今州縣之政非法令所及者
世不復議二君獨能追公之節尊而事之以風示當世

爲法令之所不及是可謂有志者也

汲郡甄濟有操行隱居青巖山安祿山為採訪使奏掌書記濟察祿山有異志詐得風疾昇歸家祿山反使蔡希德引行刑二人封刀召之濟引首待刃希德以實病白祿山乃免後慶緒亦使彊昇至洛陽會官軍平東京濟起詣軍門上謁做遣詣京師肅宗命館之于三司令受賊官爵者列拜以愧其心

李懷光潛與朱泚通謀其養子石演芬遣客詣行在告

之事覺懷光召演芬責之曰我以爾為子奈何負我死
甘心乎演芬曰天子以太尉為股肱太尉以演芬為心
腹太尉既負天子演芬安得不負太尉乎演芬胡人不
能異心惟知事一人苟免賊名而死死甘心矣懷光使
左右鬻食之皆曰義士也以刀斷其喉而去

朱泚召李忠臣源休姚令言段秀實等議稱帝事秀實
勃然起奪你笏前唾泚面大罵曰狂賊吾恨不斬汝萬
段豈從汝反耶以笏擊泚中其額濺血灑地

後唐李從珂至昭應聞前軍獲王思同曰思同雖失計然盡心所奉亦可嘉也至靈口前軍執思同以至從珂責讓之對曰思同起行間先帝擢之位至節將常愧無功以報大恩非不知附大王立得富貴助朝廷自取禍殃但恐死之日無面目見先帝于泉下耳敗而釁鼓固其所也請蚤就死王為之改容曰公且休矣欲宥之而楊思權之徒恥見其面尹暉盡取思同家資妓妾屢言于劉延朗曰若留思同慮失士心屬從珂醉不待報擅

殺之及其妻子從珂醒怒延朗嗟惜者累日

董璋反兵至閬州晝夜攻之城陷殺李仁矩初璋為梁將指揮使姚洪嘗隸麾下至是密以書誘之洪投諸廁城陷璋讓之曰汝何相負洪曰老賊汝昔為李氏奴掃馬糞得鬻炙感恩無窮今天子用汝為節度使何負于汝而反邪汝猶負天子吾受汝何恩而云相負哉汝奴材固無恥吾義士豈忍為汝所為乎吾寧為天子死不願與反奴俱生璋怒然鑊于前令壯士十人剖其肉自

啗之洪至死罵不絕聲唐主置洪二子於近衛厚給其家

後晉指揮使王清言于杜威曰請以步卒二千為前鋒奪橋開道公帥諸軍繼之得入恒州則無憂矣威許諾遣清與宋彥筠俱進清戰甚銳契丹小却諸將請以大軍繼之威不許彥筠敗走清獨帥麾下力戰屢請救威竟不遣一騎助之清謂其衆曰上將握兵坐觀吾輩困急而不救此必有異志吾輩當以死報國耳衆感其言莫

有退者至暮戰不息契丹以新兵繼之清及士衆盡死
契丹以羸兵驅牛羊過祁州城下晉刺史沈斌出兵擊
之契丹以精騎奪其門州兵不得還趙延壽引契丹急
攻之斌在城上延壽語之曰使君何不早降斌曰侍中
父子失計陷身北庭忍帥讐敵以殘父母之邦不自愧
恥更有驕色何哉沈斌弓折矢盡寧為國家死耳終不
效公所為明日城陷斌自殺

唐使者孫晟鍾謨從至大梁周世宗待之甚厚時召見

飲以醇酒問以唐事晟但言唐主畏陛下神武事陛下無二心及得唐蠟書名晟責之晟正色抗辭請死問以唐虛實默不對命都承旨曹翰送晟于右軍巡院與之飲酒從容問之晟終不言翰乃謂曰有敕賜相公死晟神色怡然索靴袍整衣冠南向拜曰臣謹以死報國乃就刑

宋欽宗時李綱言近世士大夫寡廉恥不知君臣之義靖康之禍能仗節死義者在內惟李若水在外惟霍安

國願加贈卹帝從其請遂贈若水觀文殿學士謚忠愍
安國延康殿學士劉韜資政殿學士詔有死節者諸路
詢訪以聞

寧宗時金中都被圍既久完顏承暉以穆延盡忠久在
軍旅悉以兵付之而自總持大綱又遣人以礮寫奏告
急金主命左監軍永錫將中山真定軍左都監烏庫哩
慶壽將大名軍萬八千西南路步騎萬一千河北軍一
萬御史中丞李英運糧大名行省富珠哩調遣繼發以

救中都英至大名得兵數萬馭衆素無紀律三月英被
酒與蒙古兵遇于霸州北大敗盡失所運糧英死士卒
殲焉慶壽永錫軍聞之皆潰歸自是中都援絕內外不
通承暉與盡忠會議期同死社稷盡忠不從承暉怒即
起還第然兵柄既皆屬盡忠承暉無如之何乃辭家廟
召左右司郎中趙思文謂之曰事勢至此惟有一死以
報國家耳五月一日承暉作遺表付尚書省令史師安
石書之皆論國家大計及平章政事高琪姦狀且謝不

能終保都城之罪從容若平日盡出財物召家人隨年
勞多寡分給之舉家號泣承暉神色泰然方與安石舉
白引滿謂之曰承暉於五經皆經師授謹守而力行之
不為虛文既被酒取筆與安石訣最後倒寫二字投筆
曰遽爾謬誤得非神志亂邪謂安石曰子行矣安石出
門聞哭聲復還問之則已仰藥死矣家人匆匆瘞庭中
是日暮凡在中都妃嬪聞盡忠將南奔皆束裝至通玄
門盡忠給之曰我當先出與諸妃啟途諸妃信之盡忠

乃與愛妾及所親者先出城不復反顧蒙古兵遂入中都吏民死者甚衆宮室為亂兵所焚火月餘不滅時蒙古主在桓州聞燕陷遣使勞明安等而輦其府庫之實北去於是金祖宗神御及諸妃嬪皆淪沒焉盡忠行至中山謂所親曰若與諸妃偕來我輩豈得至此安石奉承暉遺表至汴贈尚書令廣平郡王謚忠肅盡忠至汴金王釋不問仍以為平章政事未幾以謀逆伏誅

蒙古兵自禹山之戰散漫而北所過州縣無不降破遂

自唐州以趨汴京金二行省自鄧州赴援步騎十五萬
蒙古以騎三千尾之哈達等謀曰敵兵止三千而我不
戰是弱也金軍至鈞州沙河蒙古兵不戰而退金軍方
盤營蒙古兵復來襲金軍不得休息食飲且行且戰至
黃榆店望鈞州二十五里雨雪不能進忽有旨云兩省
軍悉赴京師哈達等遂發蒙古兵自北渡者畢集前後
以大樹塞道金將楊沃衍奪路得之金軍遂進次于三
峰山軍士有不食至三日者蒙古兵與河北兵合四面

圍之熾薪燔肉更迭休息乘金困憊乃開鈞州路縱之走而以生兵夾擊之金軍遂潰聲如崩山武仙率三十騎入竹林中遂走密縣楊沃衍樊澤張惠步持大槍奮戰而死哈達知大事已去欲下馬戰而豐阿拉已失所在哈達乃與陳和尚等以數百騎走入鈞州蒙古主在鄭州聞圖類與金相持遣琨布哈齊拉袞等赴之至則金軍已潰於是乃合攻鈞州墜其城外哈達匿窟室中城破蒙古兵發而殺之因揚言曰汝家所恃惟黃河與

哈達耳今哈達為我殺黃河為我有不降何待陳和尚
趨避隱處殺掠稍定乃出自言曰我金國大將欲見白
事蒙古兵士以數騎夾之詣圖類問其姓名曰我忠孝
軍總領陳和尚也大昌原衛州倒回谷之勝皆我也我
死亂軍中人將謂我負國家今日明白死天下必有知
我者蒙古兵欲其降不肯乃斫足脛折之劃口吻至耳
噴血而呼至死不屈蒙古將有義之者以馬漣酌而祝
曰好男子他日再生當令我得之豐阿拉是蒙古兵追躡

擒之械至官山圖類欲降之徃復數百言終不從唯曰
我金國大臣惟當金國境內死耳遂殺之金之健將銳
卒自是俱盡不復可為矣

度宗時襄陽被圍五年援兵不至呂文煥竭力拒之幸
城中稍有積粟所乏者鹽薪布帛爾張漢英守樊城募
善泅者寘蠟書於髻中藏積草下浮水而出謂鹿門既
築勢須自荆郢救援至隘口元守卒見積草多鈎致欲
為焚費之用泅者遂被獲於是郢鄧之路亦絕至是詔

李庭芝移屯郢州將帥悉駐新郢及均州河口以守要
津庭芝闖知襄陽西北一水曰清泥河源於均房即其
地造輕舟百艘以三舟聯為一舫中一舟裝載左右舟
則虛其底而掩覆之出重賞募死士得襄郢山西民兵
之驍悍善戰者三千人求將得民兵部轄張順張貴俱
智勇素為諸將所服俾為都統號貴曰矮張順曰竹園
張出令曰此行有死而已汝輩若非本心宜亟去毋敗
吾事人人感奮漢水方生乘順流發舟百艘稍進團山

下又進高頭港口結方陣各船置火鎗火炮熾炭巨斧
勁弩夜漏下三刻起碇出江以紅燈為號貴先登順殿
之乘風破浪徑犯重圍至磨洪灘以上元兵布舟蔽江
無隙可入順等乘銳斷鐵絙攢棧數百轉戰百二十里
元兵皆披靡以避其鋒黎明抵襄陽城下城中久絕援
聞順等至踊躍過望勇氣百倍及收軍獨失順越數日
有浮屍遡流而上被甲冑執弓矢直抵浮梁視之則順
也身中四創六箭怒氣勃勃如生諸軍驚以為神結冢

斂葬之貴入襄陽文煥固留共守貴恃其驍勇欲還郢
乃募二士能伏水中數日不食持蠟書赴范文虎于郢
求援元兵增守益密水路連鎖數十里列撒星椿雖魚
蝦不得度二人遇椿即鋸斷之竟達郢還報許發兵五
千駐龍尾洲以助夾擊刻日既定乃別文煥東下點視
所部軍泊登舟帳前一人亡去乃有過被撻者貴驚曰
吾事泄矣亟行彼或未及知復不能銜枚隱迹乃舉砲
鼓譟發舟乘夜順流斷絙破圍冒進元兵皆辟易既出

險地夜半天黑至小新城阿珠劉整分艤戰艦邀擊以死拒戰沿岸束荻列炬火光燭天如白晝至勾林灘漸近龍尾洲遙望軍船旗幟紛披貴兵以為郢兵來會喜躍而進舉流星火示之軍船見火即前迎及勢近欲合則來舟皆元軍也蓋郢兵前二日以風水驚疑退屯三十里而元兵得逃卒之報先據龍尾洲以逸待勞貴與戰而困且出於不意所部殺傷殆盡貴身被數十創力不能支遂被執見阿珠于樞門關阿珠欲降之貴誓不

屈乃見殺元令降卒四人昇貴屍至襄陽城下曰識矮
張都統乎此是也守陴者皆哭城中喪氣文煥斬四卒
以貴祔葬順塚立雙廟祀之

元巴延至漂水前部將武顯言水溢未可渡巴延曰此
小水不敢渡敢渡大江邪使一騎前導麾諸軍畢濟遂
薄郢州軍于城西時張世傑將兵屯郢郢在漢北以石
為城新郢在漢南橫鐵絙鎖戰艦密植椿木水中夾以
砲弩則要津皆施杙設攻具元軍襲城世傑力戰元軍

不能前遣人招世傑不聽阿珠獲俘民言沿江九郡精銳皆萃于二郢若舟師出其間騎兵不得護岸此危道也不若取黃家灣堡東有河口可由中拖船入藤湖轉而下江僅三里呂文煥亦以為便諸將曰郢城我之喉嚨不取恐為歸路患已延不從遣總管李庭劉國傑攻黃家灣堡拔之諸軍破竹席地盪舟由藤湖入漢巴延阿珠殿後不滿百騎郢州副都統趙文義帥精騎二千追之至泉子湖力戰而敗巴延手殺之郢卒皆潰元兵

進至沙洋遣俘持黃榜檄之入城守將王虎臣王大用
斬俘焚榜文煥復至城下招之亦不應日暮風大起已
延命順風掣金汁礮焚其廬舍烟焰漲天城遂破生擒
虎臣大用餘悉屠之進薄新城文煥列沙洋所馘于城
下復縛大用等至壁使招降都統邊居誼不荅明日又
至曰吾欲與呂參政語耳文煥以為降已馳馬至伏弩
亂發中文煥右臂并馬馬仆幾鉤得之衆挾文煥以他
馬奔走會其總制黃順副將任寧俱出降其部曲多欲

縋城出者居誼悉驅入當門斬之文煥乃麾兵攻城居誼以火具却之旋蟻附而上居誼度力不支拔劍自殺不殊赴火死所部三千人猶力戰悉死焉巴延壯其勇購其屍觀之遂進兵攻渠復州

巴延至常州會兵圍城姚訐陳炤劉師勇王安節力戰固守巴延遣人招之譬喻百端終不聽巴延怒命降人王良臣役城外居民運土為壘土至併人以築之且殺民煎膏取油以作砲焚其牌杈日夜攻不息城中甚急

而嘗等守志益堅巴延乃叱帳前諸軍奮勇爭先四面
並進城遂破嘗死之炤與安節猶巷戰或謂炤曰城東
北門未合可走炤曰去此一步非死所矣日中兵至死
焉巴延命屠其民執安節至軍前不屈亦死師勇以八
騎突圍走平江嘗希得之子安節堅之子也

魏天祐見時方求才欲薦謝枋得為功遣使誘枋得入
城與之言坐而不對或嫚言無禮天祐不能堪乃讓曰
封疆之臣當死封疆安仁之敗何不死枋得曰程嬰公

孫杵曰二人皆忠于趙一存孤一死節王莽篡漢龔勝
餓死司馬子長云死有重於泰山輕於鴻毛參政豈足
知此天祐怒逼之北行枋得以死自誓自離嘉興即不
食二十餘日不死乃復食既渡采石惟茹少蔬果積數
月困殆四月朔至燕問太后攢所及瀛國所在再拜慟
哭疾甚留夢炎使醫持藥雜米飲進之枋得怒擲之於
地不食五日死子定之護骸骨歸塋信州枋得天資嚴
厲雅負奇氣風岸孤峭不能與世軒輊而以天時人事

推宋必亡於二十年後每論樂毅申包胥張良諸葛亮
事常若有千古之憤者而以植世教立民彝為任貴富
賤貧一不動其中初枋得之北行也貧苦已甚衣結屨
穿人有嘗德之者賙以金帛辭不受又為詩別其門人
故友時以為讀其辭見其心慷慨激烈真可以使頑夫
廉懦夫立云

池州守王起宗聞元軍渡江棄官去通判趙卯發攝州
事卯發繕壁聚糧為固守計元遊騎至李王河都統張

林屢諷之降卯發忿氣填膺瞠目視林林不敢復言已而林帥兵巡江陰遣人納款而陽助卯發為守守兵皆歸于林卯發知事不濟乃置酒會親友與訣謂妻雍氏曰城將破吾守臣不當去汝先出走雍曰君為忠臣我獨不能為忠臣婦乎卯發笑曰此豈婦人女子所能也雍曰吾請先君死卯發笑止之明日乃散其家貲與弟姪僕婢悉遣之元兵薄城卯發晨起書几上曰國不可背城不可降夫婦同死節義成雙遂與雍氏同縊死於

從容堂林開門降已延入城問太守所在左右以死對
深歎息之命具棺衾合葬祭其墓而去事聞贈華文閣
待制謚文節雍氏贈順義夫人

元軍略饒州知州唐震發州民城守時元遣使來取降
款通判萬道同陰使所部斂白金牛酒備降禮微諷震
降震叱之曰我忍偷生負國邪城中少年感震言殺元
使者已而元軍登陴衆皆散震入坐府中元軍執牘使
署降震擲筆於地不屈遂死之兄椿與家人俱死初江

萬里聞襄樊破鑿池芝山後圃扁其亭曰止水人莫喻其意至是執門人陳偉器手曰大勢不可為余雖不在位當與國為存亡既而元軍執其弟知南劔州萬頃索金銀不得支解之萬里赴止水死左右及子鎬相繼投沼中積屍如壘翌日萬里屍獨浮出水上從者斂葬之事聞贈震華文閣待制謚忠介萬里太傅益國公謚文忠

宋都將與李恒等長驅所至莫當其鋒隆興轉運判官

劉槃以城降不數月取江西十一城進逼撫州時黃萬石開閩州治聞兵至奔建昌都統密佑率衆逆戰進賢坪元兵呼曰降者乎鬪者乎佑曰鬪者麾其兵突進元軍圍之數重佑身被四矢三鎗猶揮刀率死士數十人斫圍南走前渡橋板斷被執宋都斛曰壯士也欲降之不屈又命劉槃呂師夔以金符遺之佑不受復令佑子說之曰父死子安之佑斥曰汝行乞于市第云密都統子誰不憐汝怡然自解其衣請刑遂死元進取建昌萬

石走入閩

朱立初從陳奕守黃州奕降立潰圍出黃萬石署之帳
前元軍略江西立迎戰于江防兵敗被執不降繫獄至
是萬石舉兵降元元行省遣萬石諭立曰吾官銜一牙
牌書不盡今亦降矣立曰侍郎國家大臣立一小卒爾
但三世食趙氏祿趙亡何以生為立乃陳上生擒合死
之人與投拜者不同萬石再三諭之不屈遂遇害

阿爾哈雅督戰益急與諸將畫地分圍決湟水以樹梯

衝城中大窘力不能支諸將泣請曰事急矣吾屬為國死可也如民何李芾罵曰國家平時所以厚養汝者為今日也汝第死守有復言者吾先戮汝除夕元兵登城蟻附而上知衡州尹穀時寓城中知事不可為乃為二子行冠禮或曰此何時行此迂闊事穀曰正欲令兒曹冠帶見先人于地下爾既畢禮與其家人自焚芾命酒酌之因留賓佐會飲夜傳令猶手書盡忠字為號飲達旦諸賓佐出參議楊震赴園池死芾坐熊湘閣召帳下

沈忠遺之金曰吾力竭分當死吾家人亦不可辱於俘
汝盡殺之而後殺我忠伏地叩頭辭以不能芾固命之
忠泣而諾取酒飲其家人盡醉乃徧刃之芾亦引頸受
刃忠縱火焚其居還家殺其妻子復至火所大慟舉身
投地乃自刎幕僚陳億孫顏應焱皆死潭民間之多舉
家自盡城無虛井縊林木者相望元旦守將吳繼明劉
孝忠以城降阿爾哈雅傳檄諸郡由是袁連衡永彬全
道桂陽武岡皆降于元寶慶通判曾如驥亦不屈而死

事聞贈弔端明殿大學士謚忠節

臨安既陷阿珠以太皇太后手詔諭李庭芝使降庭芝
登城謂使者曰奉詔守城未聞以詔諭降也及帝次瓜
洲太皇太后復賜庭芝詔曰比詔卿納款日久未報豈
未悉吾意尚欲固圍邪今吾與嗣君既已臣伏卿尚為
誰守之庭芝不荅命發弩射之一使斃餘皆奔去阿珠
乃遣兵守高郵寶應以絕其餉道博瀨歡又攻拔泰州
之新城驅夏貴淮西降卒至城下以示庭芝庭芝幕客

或勸為計庭芝曰吾惟一死而已阿珠復遣使者持元
主詔招庭芝庭芝開壁納使者斬之焚其詔于俾上既
而淮安盱眙泗州以糧盡降元庭芝猶括民間粟以給
兵粟盡又令官人出粟粟又盡令將校出粟雜牛皮麩
藥以給之兵有自食其子者然猶力戰不屈姜才聞高
郵米運將至出步騎五千戰于丁村自夜達旦元兵多
敗董士元戰死阿珠令巴延察救之所將皆阿珠麾下
才軍識其旗幟皆潰才脫身走阿珠請元主降詔赦庭

芝焚詔殺使之罪令早歸歎庭芝不納會福州使至庭芝命制置副使朱煥守揚而自與姜才將兵七千趨泰州將東入海庭芝既行煥即以城降阿珠分道追及庭芝殺步卒千餘人庭芝走入泰州阿珠圍之且驅其妻子至陴下招降會姜才疽發背不能戰泰州裨將孫貴胡惟孝開北門納元軍庭芝赴蓮池中水淺不死遂與姜才俱被執至揚州阿珠責其不降才曰不降者我也憤罵不已然猶愛其才勇未忍殺之朱煥請曰揚自用

兵以來積骸滿野皆庭芝與才所為不殺之何俟阿珠
乃皆殺之楊民間者莫不泣下

文天祥屯潮陽鄒鳳劉子俊皆集師會之遂討劇盜陳
懿劉興于潮興死懿遁以海舟導張弘範兵濟潮陽天
祥帥麾下走海豐先鋒將張弘正追之天祥方飯五坡
懿弘正兵突至衆不及戰天祥遂被執吞腦子不死鄒
鳳自剄劉子俊自詭為天祥冀可免天祥及天祥至各
爭真偽元遂烹子俊天祥至潮陽見弘範左右命之拜

天祥不屈弘範釋其縛以客禮之天祥固請死弘範不許處之舟中求族屬被俘者悉還之

厓山之破張弘範等置酒大會謂天祥曰國亡丞相忠孝盡矣能改心以事宋者事今將不失為宰相也天祥泣然出涕曰國亡不能救為人臣者死有餘罪況敢逃其死而貳其心乎弘範義之遣使護送天祥赴燕道經吉州痛恨不食八日猶生乃復食十月至燕館人供張甚盛天祥不寢處坐達旦遂移兵馬司設卒守之既而

丞相博囉等名見於樞密院欲使拜天祥長揖不屈博囉曰自古有以宗廟土地與人而復逃者乎天祥曰奉國與人是賣國之臣也賣國者有所利而為之必不去去者必非賣國者也予前代宰相不拜奉使軍前尋被拘執已而有賊臣獻國國亡當死所以不死者以度宗二子在浙東老母在廣故耳博囉曰棄德祐嗣君而立二王忠乎天祥曰當此之時社稷為重君為輕吾別立君為宗廟社稷計也從懷愍而北者非忠從元帝為忠

從徽欽而北者非忠從高宗為忠博囉語塞忽曰晉元
帝宋高宗皆有所受命二王不以正是篡也天祥曰景
炎乃度宗長子德祐親兄尚可謂不正登極於德祐去
位之後不可謂篡陳丞相以太皇命奉二王出宮不可
謂無所受命博囉等皆無辭但以無受命為解天祥曰
天與之人歸之雖無傳受之命推戴擁立亦何不可博
囉怒曰爾立二王竟成何功天祥曰立君以存宗社存
一日則盡臣子一日之責何功之有曰既知其不可何

必為天祥曰父母有疾雖不可為無不下藥之理盡吾心焉不可救則天命也今日天祥至此有死而已何必多言博囉欲殺之而元主及大臣不可弘範病中亦表奏天祥忠於所事願釋勿殺乃囚之

忠良

五則附

齊侯問於晏子曰忠臣之事君也何若對曰有難不死出亡不送君曰列地而與之疏爵而貴之君有難不死出亡不送可謂忠乎對曰言而見用終身無難臣奚死

馬諫而見從終身不亡臣奚送焉若言不見用有難而死是妄死也諫不見從出亡而送是詐為也故忠臣也者能盡善與君而不能與陷於難

魯人攻鄆曾子辭于鄆君曰請出寇罷而後復來請姑毋使狗豕入吾舍鄆君曰寡人之於先生也人無不聞今魯人攻我而先生去我我胡守先生之舍魯人果攻鄆而數之罪十而曾子之所爭者九魯師罷鄆君復修曾子舍而後迎之

宋司城子罕之貴子韋也入與共食出與同衣司城子罕亡子韋不從子罕來復召子韋而貴之左右曰君之善子韋也君亡不從來又復貴之君獨不愧于君之忠臣乎子罕曰吾惟不能用子韋故至于亡今吾之得復也尚是子韋之遺德餘教也吾故貴之且我之亡也吾臣之削迹拔樹以從我者奚益于吾亡哉

魏文侯觴大夫于曲陽飲酣文侯喟然歎曰吾獨無豫讓以為臣蹇重舉酒進曰臣請浮君文侯曰何以對曰

臣聞之有命之父母不知孝子有道之君不知忠臣夫
豫讓之君亦何如哉文侯曰善受浮而飲之醕而不讓
曰無管仲鮑叔以為臣故有豫讓之功也

趙簡子曰吾欲得范中行氏良臣史鱗曰安用之簡子曰良
臣人所願也又何問焉曰君以為無良臣故也夫事君者
諫過而薦可章善而替否獻能而進賢朝夕誦善拜而納
之聽則進否則退今范中行氏之良臣也不能匡相其君
使至於難出在於外又不能入亡而棄之何良之為若

不棄君安得之夫良將營其君使復其位死而後止何
曰以來若未能乃非良也簡子曰善



經濟類編卷八十五